

# Schaiive klap

## Oetstaarven

En 'Mien Bröddellabbe', n boukje mit 'Grönneger riemsels' van Geert Teis Pzn lees ik bie t verschienen van twijde drok in pril negentienzestien, n regel woar ik aan denken mos, toun ik n bericht in kraante tegenkwam, dat der elke twij weken n toal oetstaarft. Teis schreef: 'Veur méér lu - zai we nou ja - as wie denken können, veur véul meer, dei de aole tied en dei aole taol nait vergeten kennen' (mit de a nog veur de o). Dat was al bie twijde drok. Der kwamen nog drije achteraan!

n Zunneg oetzicht, moar t is nait allain moar rozegeur en moaneschien dat nuigt. Nog moar even leden kregen wie al te heuren, dat dialectproaters zulfs nait deugen om veur duvel te daanzen. Onbetaauwboar as rek van n stuver t el. En ook dat streektal achterhoald is; oet n tied dij nait meer bestait. Regionoale toalen werren alderdeegs vijandelk nuimt. En nou net weer komt nije elinne over ons hen. Tiedens n soamkomst in Amsterdam wer ons dudelk moakt, dat minder den tien persint van ale toalen komende aiw overleeft. Elke twij weken staarft der n toal oet. En dat is nog moar n begun. t Wazzen nait de eersten de besten dij ons woarschaaudwen. Geleerde koppen, vergis joe nait! t Volk was bienander komen om onderschaiden te worren en beloond mit n dikke pude mit sinten. n Perfester oet ons aigen laand kreeg moar laifst twij miljoun. Doar magge mit perbaaiern nog wat toalen te redden. Man - F. Kortlandt - is hoogleroar aan hogeschoul in Leiden; in Balto-Sloavische toalen. Nait direkt proaterij van noast deure, moar dat gefst niks, perfester het beleufd zien alderduvelste best te doun. En as je geleuven maggen wat van hom zegd wordt, wait hai der n bult van. Hai mout ain van de grootste toalkundigen van dizze tied wezen. t Gait bie hom vot nait om t Chinees of t Sanskriet. Hai het t over Tochaars, t Tangoet en t Lepcha. t Zegt mie - as ik hail

eerlek bin - hailendonder niks, moar woar t mit t Tochaars begunt, hem je veur je t waiten poppen aan daanzen in Finnerwold en Zeuvenhoezen. 'Toalen staarven oet,' holt Körtlandt ons veur, 'as kulturele kontraainen verhenneweerd worren'. Hai gefst schuld aan de allernoaste ekonomische grui van dizze joaren. De helfte van de zesdoezend toalen dij der nou nog overbinnen, verdwient de komende generoatsie al. 'As t om daaiern gong,' maint Körtlandt, 'har we t over n ekologische ramp. Haalsoverkop werren moatregels nomen. Wis.'

Wie waiten wat ons stait te duchten. As we nait deksels oppazen binnen wie ons aigen toal kwiet veur we der op verdocht binnen. Hait Glins nog allain Godlinze en gain minsk het nog wait van n spaigelploatje. Vraizen laggen zok de buutse oet; Fryslan boppe, Grins in de gruppe. Zo laank heur toaltje te minzent nog in gebruik is. Moar dij is heur haileg. Drenten gongen ons aal joaren eer veur. Dat binnen gain vechters.

Ik vrees dat wie der nait onderoet komen om riegen te sloeten en mitnander ten striede te trekken. Van zulm onder aanvuiern van Siemon. Ons bloudaigen Siemon Reker. Van dij twij miljoun van perfester Körtlandt mout n nuver dail noar hom tou. Zunder genog finansies begun je tegenswoardeg niks meer. Westerlingen dij Raandstad ontvlochten en zok vestegden in Ol Pekel of Nijziel mouten verplicht worren n specioale kurzes Boers te ondergoan. Zai mouten bözzelen over beune! En ook stadgers dij zok te groot vuilen om streektal te proaten, mouten op heur ondeugd wezen worren. Wie huiven ons nait al te slim drok te maken as der n moal n toal votvaalt - der binnen ook al joaren gain dinosaurussen meer en ik mis ze gain daag en as mörgen leste laankbainde mug dood haauwen wordt, rouw k er gain tel om - moar wie mouten der wel veur zörgen, dat ons aigen toal ook volgende aiw overleeft!

RITZ.

N 6 h/V 24-10-97